

# INUIT ATAQATIGIIT

## INATSISARTUNI



UKA 2014/176

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Meeqqat inuusuttullu 16-init 24-nut ukiullit annertuumik innarluutillit Kalaallit Nunaata avataani uninngagallartut ukiumut marloriarlutik Kalaallit Nunaannut tikeraarluni angalanermut pisinnaatitaaffeqassasut erseqqissaavigeqqullugu qulakkeerneqaqqullugulu Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Agathe Fontain, Inuit Ataqatigiit)

### Tunngavilersuut

Isumakuluuteqarpunga. Erngumavunga sissuinngikkutta innarluutilittatsinnut atugassarititaasut ilungersunarnerlulitillu ajornerulissasoralugit.

Annertuumik innarluutillit ikiorserneqartarnerat pillugu Namminersorlutik Oqartussat nalunaarutaanni nr. 23, 30. december 2013-imeersumi § 56 naapertorlugu meeqqat inuusuttullu 16-init 24-nut ukiullit annertuumik innarluutillit Danmarkimi uninngagallartut ukiumut marloriarluni Kalaallit Nunaannut tikeraarluni angalanermut ikiorserneqarsinnaapput. Nalunaarut tusarniaassutigineqarmat aalajangersagaq ima nipeqartinneqarpoq pineqartut ukiumut marloriarluni Kalaallit Nunaannut tikeraarluni angalanermut pisinnaatitaaffeqartut. Inatsisip suliarineqarnerani susoqarsimasoq-una ukiumut marloriarluni taamatut tikeraarluni angalasinnaatitaanerit ikiorserneqarnissamut periarfissiinerinartut isigineqalersissimanerannut?

Eqqaamaqqissaarpara taamani 2010-mi aalajangeratta januaarip aallaqqaataanit 2011-mit innarluutilinnik sullissineq kommuninut nuunneqassasoq taamani piumasarigatsigu innarluutillit atugaat ajornerulersinneqassanngitsut. Maannamut suli apeqqutaavoq taamani aalajangiigatta innarluutilinnut atugassarititaasut ajornerulersinneqannginnissaannik isumalluutinillu atorluaasoqalernissaannik piumasaqaatiginikuusarput nuussisoqarneratigut attanneripput?

Aammalu eqqaasitsissutigissavara Ilaqutariinnermut Ataatsimiititaliap nuussinissamut siunnersuut pillugu isumaliutissiisummini oqaatigimmagu nuussisoqarneranit ukiut tallimat qaangiutinnginnerini nuussineq, aammalu nuussinerup kingunerinik naliliineq, pillugu Ilaqutariinnermut Ataatsimiititaliamut Naalakkersuisut nassuiaasiussasut. Aningaasaqarniarnermut innarluutillillu atugaannut tunngasut immikkut ittumik allaaseralugit. Taamatut nassuiaasiorlutik Naalakkersuisut qaqugu aallartinniarpat?

Innarluutilittatsinnut atugassarititaasut qulakkeerneqarnissaat pillugu manna siunnersuut pillugu aammalu inuit pineqartut ukiumut marloriarluni tikeraarluni angalasinnaatitaanerit qulakkeerumallugu Naalakkersuisut inatsisissatut siunnersuusiorniarnersut imaluunniit meeqqat inuusuttullu innarluutillit uninngasut imaluunniit illoqarfiup kingornguiup avataanut inissitat ukiumut marloriarluni illoqarfimmu kingornguigisamut tikeraarsinnaatitaanerannik qulakkeerinittumik, tassa imaappoq ikiorserneqarsinnaaginnaratik, allannguutitalimmik Naalakkersuisut nalunaarutiliornissaat maannamut naammakkallassanersoq naalakkersuinikkut nalunaaruteqarumaartoqarnissaa utaqqimaassavara.

Pisariaqassappat Inuit Ataqatigiinni ammavugut innarluutillit assigiaanik pisinnaatitaaffiinik minnerpaaffilikkanik qulakkeerinittumik Inatsisartut inatsiliortoqarnissaanut, imaangitsoq qanimut aaqqiissuteqartoqarnissaanut Naalakkersuisut piginnaatitsissummik tunineqaan-

nassasut.

Atugarissaarneq ilullineqassasoq aseroriartortinneqassasorlu eqqasuutiginnaleqinagakku innarluutilittatsinnut atugassarititaasut ajornartorsiullu pineqartoq pillugit Inatsisartuni tunngaviusumik isummersortoqarnissaa qilanaaraara.

Oqallilluarisitoq!

**Pisortani aningaasaqarnikkut allaffissornikkullu kingunerisassa**

Inunnut pineqartunut tunngatillugu ukiumut marloriarluni tikeraarluni angalasinnaa-titaanermut tunngatillugu maannamut inatsisitigut inissisimaneq attatiinnarneqassappat allannguutit erseqqissaarnerillu pisariaqartinneqartut naammassineqaqqullugit suliasamik piareersaasiornissap saniatigut siunnersuut aningaasaqarnikkut allaffissornikkullu nutaanik kinguneqassanngilaq.

Missingerneqarpoq suliaq taanna ukioq kaajallallugu AC-fuldmægtigip sulinerata 1/40-iaatut naleqassasoq, kr. 12.500 tikillugit akeqarsinnaassalluni.

**Namminersorlutik inuussutissarsiortunut aningaasaqarnikkut allaffissornikkullu kingunerisassa**

Namminersorlutik inuussutissarsiortunut aningaasaqarnikkut allaffissornikkullu kinguneqas-sanngilaq.

**Innuttaasunut aningaasaqarnikkut allaffissornikkullu kingunerisassa**

Innuttaasunut aningaasaqarnikkut allaffissornikkullu kinguneqassanngilaq.